

DEVOZION

L più antich ex voto ladin

L Museo Diozesan Tridentin ge à renovà l contrat de emprest al Museo Ladin de Fascia per l meter amò fora te la sala dedichèda a la usanzas de devozion

L é l più antich ex-voto cognosciù con na scritta per ladin fascian e più che un detai fèsc entener che l podessa vegnir da Sèn Jan o da Vich. Da più che diesc egn l fèsc bela parbuda te la sala del Museo Ladin de Fascia dedichèda a la usanzas de devozion. L é de proprietà del Museo Diozesan Tridentin che lo à metù a la leta del Museo Ladin e col nef an l à renovà l contrat de emprest per l meter amò fora, de gra a la percacenta colaborazion anter i doi enc.

Se trata del depent dal titol «Madonna con Bambino, San Giovanni Battista e una casa colpita da un fulmine» fat del 1855 da n pitor descognosciù.

La carateristica maora e de gran enteres de chest depent l é la iscrizion duta per fascian.

Soravia, apede al retrat de la Madona compagnèda da Sèn Jan Batista, se lec: «Pa aer tgiapa grazia» enzeze sotite, olache l é la cèsa tarlivèda vegn contà chel che l é sozedù: «L di 27 d'aost 1855 l'è sutà xu la saeta xu par la tgiasa de Loixio Cigolla 'ndana che dutte le parsona de famiglia le era la ite ei 'nlongia botgia de fornèl e na creatura te tgiasa da fech. La saeta la é xita te fornèl e te tgiasa da fech mo par miracol no la ge ha fat nia a nesugn».

Da chesta scritta se pel entener belapontin che l podessa vegnir da Sèn Jan o da Vich. Dantaldut l'iscrizion la é per brach, l perferent



L ex voto con la scritta per fascian.

se scrif Cigolla e sul depent l é Sèn Jan Batista, patron de la Pieif de Sèn Jan e de Fascia. Ma se enten ence cotant grana che la era la fe de nesc giaves che tedant a n fat coscita grief, vedù che nesciugn de la familia se à fal mèl, i à fat fèr n ex voto per rengrazièr l Segnoredio e la Madona de la grazia abuda.

L Museo Ladin de Fascia e l Museo Diozesan vel meter al luster la valuta de chesta colaborazion che à dat l met de fèr cognoscer n ejempie zis curious de la vita de duc i dis di secoi passé.

Chi che vel se fèr na marevea de la valuta de chest melaur artistich, culturèl e sozièl de noscia comunanza i pel jir a l veder te Museo Ladin a Sèn Jan.